

巖志園記

園在越後蒲原郡水原望族市島光廣之所
開也光廣之考曰千吉好慈惠視人之急猶
視己急嘗有營別墅之志未果而歿光廣嗣
欲成先志者有年矣天保丁酉歲大饑餓孚
載道水原土豪相謀各糶私粟極賤其價然
細民小戶窮匱已甚無貲買斗升光廣見之
惻然以為及今營墅則民得食於工而庶幾
免飢餓矣是光廣之志也宅後有沔池可填
以為園因聚小戶不能自食者謂曰吾今填
池欲服工者聽其法五人為伍伍運土一升
者給金一方日中餉以飯五合民喜而趨之
既數月米價頗落乃罷翌年凶荒更甚民連
署請復工聽之凡五年而畢因以舉火者數
百家聞者莫不嗟嘆焉市島氏所有福島新
田以下十餘村戊子地震佃戶屋舍多崩壞
光廣又出三千金貸之其恤人濟物率此類
也墅植以花木瀟洒淡雅無華美之觀光廣
歿長子宗鋪承後不敢改其舊頃徵園名於
余余曰夫孝善繼人之志宜命曰繼志余識
市島氏三世乃祖勤儉而慈惠乃父豪邁而
務施宗鋪謹慎而守約雖性度不同其為仁
人則一也抑市島氏奕世盡力於農織田園
蕃殖殆遍蒲原一郡官家褒賞許以稱姓氏
佩兩刀且加賜三口俸家道隆盛州內罕比
是豈非積善之餘慶耶樂善祖宗之志也繼
志子孫之責也嗚呼是此園之所以不可無
記也歟

嘉永元年正月
大正二年一月

鍾山內藤公基撰
白眼居士前島密篆額
霖谿居士日高秩父書